

आकाशवाणी जयपुर-अजमेर

प्रादेशिक समाचार

दिनांक 10.06.2025

समय: 18.45 बजे

व टोंक मांय बनास नदी मांय 11 नौजवान बह्या- आठ री मौत-तीन जणा ने बचायी ज्यां

व प्रधानमंत्री नरेन्द्र मोदी लारला 11 साल मांय रक्षा हलका मांय व्ही प्रगति ने खुद रे पाण ऊबा व्हेवण अर आधुनीकीकरण री निशाणी बतायों

व विद्युत मंत्रालय वी.जी.एफ. योजना रा तैत राजस्थान ने चार हजार मेगावाट प्रति घंटा री बैटरी ऊर्जा भंडारण प्रणाली आवंटित कीनीं

व पुलिस महानिदेशक यू.आर. साहू ने राजस्थान लोक सेवा आयोग रा अध्यक्ष नियुक्त करी ज्यां

000

टोंक मांय सदर थाना हलका रा जूना पुल कने बनास नदी मांय डूब जावण ऊं आज आठ नौजवानां री मौत व्हे गयीं मरण वाळा सगळा नौजवान जयपुर रा रेहवासी हां टोंक रा एस.पी. विकास सांगवान आकाशवाणी ने बतायो के हादसो दोपेरां री बगत व्ह्यो जद 11 गोठ मनावण सारु बनास नदी कने पूग्या नौजवान नदी मांय नहावण सारु उतर्यां ई पाछे कुछ लोग पाणी मांय बेहवण लाग्या, ज्यां ने बचावण सारु दूजा जणा ई पाणी मांय उतर्या अर हादसा री फॅट मांय आ ग्यां एस.पी. बतायो के हादसा री जाणकारी मिलतां ई पुलिस अर प्रशासन री टीम मौके पूग र बचाव रा काम सरु कर दीना अर तीन जणां ने बचा लिया ज्यां

राज्यपाल हरिभाऊ बागडे अर मुख्यमंत्री भजन लाल शर्मा हादसा माथे दुःख जतायो हैं पैली वाळा उपमुख्यमंत्री सचिन पायलट ई हादसा ने घणो दुःख देवण वाळो बतायों

000

प्रधानमंत्री नरेन्द्र मोदी रक्षा हलका मांय लारला ग्यारह साल मांय भारत री अभूतपूर्व प्रगति री सराहवणा कीनी हैं सोशल मीडिया पोस्ट मांय श्री मोदी मांड्यो के इण ऊं खुद रे पाण ऊबा व्हेवण अर आधुनीकीकरण ने मजबूती मिली हैं

प्रधानमंत्री कह्यो के देश विश्व स्तर री खेल महाशक्ति बणबा ओड़ी बढ़ रह्यो है, जो खेलां ऊं जुड्या बुनियादी ढांचा ने मजबूत बणावण ऊं संभव व्हे सक्यो केंद्रीय खेल मंत्री डॉ. मनसुख मांडविया रो लेख साझा करता थकां प्रधानमंत्री कह्यो के देश मांय खेलां रा बुनियादी ढांचा रो लगातार विकास कर्यो जा रह्यो हैं लेख मांय मांडविया मांड्यो के लारला ग्यारह साल मांय खेलां रा हलका मांय जबरदस्त बदलाव आयो है अर युवा कार्यक्रम अर खेल मंत्रालय रो बजट तीन गुणा बध ग्यों

000

मुख्यमंत्री भजनलाल शर्मा कह्यो है के लारला ग्यारह साल बदलाव, बरकत अर गौरव रा रह्या हैं वे आज जयपुर रा प्रदेश भाजपा कार्यालय मांय **11 वर्ष संकल्प से सिद्धी** मुद्दा माथे खबरनवीसां सागे राख्यी ज्यी बातचीत रे दौरान बोल रह्या हां वे कह्यो के लारला 11 साल मांय देश रा समावेशी विकास माथे जोर दियो ज्यों श्री शर्मा कह्यो के गरीबां, नौजवानां, अन्नदाता अर नारी शक्ति ने मजबूत बणावण सारु खास काम करी ज्यां

प्रदेश भाजपा मुख्यालय मांय संकल्प से सिद्धी अभियान रा तैत मोदी सरकार री उपलब्धियां री प्रदर्शनी ई लगायी ज्यी हैं

000

विद्युत मंत्रालय वी.जी.एफ. योजना रा तैत राजस्थान ने चार हजार मेगावाट प्रति घंटा री बैटरी ऊर्जा भंडारण प्रणाली रो आवंटन कीनो हैं मुख्यमंत्री भजनलाल शर्मा ई सारु प्रधानमंत्री नरेंद्र मोदी अर केन्द्रीय ऊर्जा मंत्री मनोहर लाल रो आभार जतायो हैं मुख्यमंत्री सोशल मीडिया पोस्ट रे जरिये कह्यो के केन्द्र रा ई फैसला ऊं राज्य मांय ऊर्जा हलका ने नुवी दिशा मिलेलां वी.जी.एफ. योजना ऊं राज्य मांय गैर-सरकारी हलका ने बुनियादी ढांचा विकास रा काम मांय निवेश करण सारु अर नवीकरणीय ऊर्जा परियोजना रा विकास ने बधावो दियो जावे हैं

000

राज्य रा पुलिस महानिदेशक यू.आर. साहू ने राजस्थान लोक सेवा आयोग रा अध्यक्ष नियुक्त करी ज्या हैं राज्यपाल हरिभाऊ बागडे री मंजूरी पाछे कार्मिक विभाग ई बारा मांय हुकम जारी कर दीनों इण ऊं पैली श्री साहू मर्जी ऊं रिटायरमेंट लेवण री अर्जी दीनी जो मंजूर कर लीरीजीं ई बीचे, भ्रष्टाचार निरोधक ब्यूरो रा महानिदेशक रवि प्रकाश मेहरड़ा ने पुलिस महानिदेशक रो अतिरिक्त कार्यभार संपी ज्यो हैं

000

राज्य मांय जन्म, मौत अर ब्याह रा रजिस्ट्रेशन अब ऑनलाइन वेब पोर्टल पहचान रे मार्फत कर्यो जा रह्यो हैं जनता रा सुबीता अर सेवावां री आसानी सारु पोर्टल ऊं जारी करी ज्या सर्टिफिकेट अब व्हाट्सएप रे जरिए ई मुहैया कराया जा सकेलां अब कम्प्यूटर रे जरिये जारी कर र ई-साइन वाळा सर्टिफिकेट व्हाट्सएप रे जरिये ई मुहैया कराया जावेलां आर्थिक अर सांख्यिकी निदेशालय रा निदेशक विनेश सिंघवी बतायो के ई सुबीता रो फायदो लेवण सारु अर्जी देवण वाळा ने पंजीकरण री बगत वां रो व्हाट्सएप वाळो मोबाइल नम्बर बतावणो व्हेलां

000

प्रदेश मांय घणखर ठौड़ां लू बाजण सागे जोरदार गर्मी पड़ रही हैं केई जिलां मांय पारो 45 डिग्री सेल्सियस ने पार कर ग्यों जबरदस्त गर्मी ऊं निजात सारु लोग भांत-भांत रा जतन कर रह्या हैं मौसम विभाग रे मुजब प्रदेश मांय एक सप्ताह ताई जोरदार लू बाजण री संभावना हैं म्हाणा खबरनवीस बतायो के रात री बगत ई पारो ऊंचो रेहवण रा आसार हैं

मौसम महकमा रे मुजब श्रीगंगानगर अर हनुमानगढ़ जिलां मांय आवता 2-3 दिन अधिकतम तापमान 47 ऊं 48 डिग्री सेल्सियस बीचे रेहवण अर जोरदार लू बाजण री संभावना हैं जयपुर, भरतपुर अर कोटा संभाग मांय दिन री बगत तेज लू बाजण अर रात री बगत ई जोरदार गर्मी रेहवण रा आसार हैं

महकमा रे मुजब 15-16 जून ऊं कोटा अर भरतपुर संभाग मांय कठे-कठे हल्की बारिश सारु व्हेवण री संभावना हैं बीकानेर संभाग अर आरे-सारे रा हलकां मांय आवता 2-3 दिन जोरदार बायरो बाजण री शंका हैं जोरदार गर्मी ने ध्यान राखता थकां चिकित्सा अर स्वास्थ्य विभाग जनता ऊं सावचेती राखण री अपील कीनी हैं श्रीगंगानगर मांय स्वास्थ्य केन्द्रां सागे अब जनता री आवण-जावण री ठोड़ां अब खास टीमां रे जरिए ओ.आर.एस. रो घोळ मुहैया करायो जा रह्यो हैं

000

11वां अंतर्राष्ट्रीय योग दिवस उत्सव री धूम दुनियाभर मांय निज़र आ रही हैं ओ दिन डोढ़ सौ ऊं बत्ता देशां मांय मनायो जावेला अर करोड़ां लोगां रे इण ऊं जुड़बा रा आसार हैं प्रदेश मांय ई न्यारा-न्यारा कार्यक्रमां रे जरिये योग ने रोजमर्रा रो हिस्सो बणावण री प्रेरणा दी जा रही हैं इण ई रा तैत भेळा योगाभ्यास अर जागरुकता कार्यक्रमां रो सिलसिलो चाल रह्यो हैं आज बाड़मेर री रिज़र्व पुलिस लाईन मांय जवानां सारू योग अभ्यास रो कार्यक्रम राख्यी ज्यों अंतर्राष्ट्रीय योग दिवस रा सिलसिला मांय आकाशवाणी जयपुर रा क्षेत्रीय समाचार एकांश री ओर ऊं संदेश श्रृंखला चलायी जा रही हैं जोधपुर री योग प्रशिक्षक कीर्ति चौरड़िया रो कहवणो है के योग री सरूआत बचपन ऊं करणी चाहिजें

000

राज्यपाल हरिभाऊ बागड़े वंचित तबका रा हर एक जणा ने सरकार कानी ऊं चलायी जा रही जनता रा भला री योजनावां रो फायदो दिरावण माथे ज़ोर दीनो हैं श्री बागड़े आज डीडवाना-कुचामन ज़िला रा अहलकारां सागे राख्यी ज्यी समीक्षा बैठक मांय बोल रह्या हां राज्यपाल प्रधानमंत्री आवास योजना, प्रधानमंत्री ग्राम सड़क योजना, जल जीवन मिशन अर स्वच्छ भारत मिशन समेत विकास रा न्यारा-न्यारा कामां री प्रगति रो जायजो लीनो अर अहलकारां ने जरूरी हुकम दीनां मीटिंग ऊं पैली राज्यपाल मस्कुलर डिस्ट्रॉफी रा मरीज पांच बच्चां ने इलेक्ट्रॉनिक व्हीलचेयर दीनीं श्री बागड़े परबतसर उपखंड री खोखर ग्राम पंचायत मांय वंदे गंगा जल संरक्षण जन अभियान रा तैत बालाजी मिन्दर मांय पौधा रोप्यां

000